

Se raige et derverie

Linker 50,9; RS 1128

Mss.: M 46, T 99 = Conon de Bethune; e 2 = anonimo.

Metrica: a6' b6 a6' b6 b6 a6' a6' b6 (MW 860,123). *Chanson* di 5 *coblas doblas* di 8 versi.

Edizioni: Wallensköld 1921, p. 10.

- letto 739 volte

Edizioni

- letto 560 volte

Wallensköld

I.
Se raige et derverie
Et destrece d'amer
M'a fait dire folie
Et d'amors mesparler,
Nus ne m'en doit blasmer.
S'ele a tort m'i fausnie,
Amors, qui j'ai servie,
Ne me sai ou fier.

II.
Amors, de felonie
Vous vurai esprover;
Tolu m'avés la vie
Et mort sans deffier.
La m'avés fait penser
Ou ma joie est perie;
Cele qui jou em prie
Me fait d'autre esperer.

III.

Plus est belle k'imaige
Cele ke je vos di,
Mais tant a vil coraige,
Anuieus et failli,
K'ele fait tot ausi
Com la leuve sauvaige
Ki des leus d'un boskaige
Trait le pieur a li.

IV.
N'a pas grant vasselaige
Fait, s'ele m'a traï;
Nus ne l'en tient por saige.
Ki son estre ait oï;
Mais puis k'il est ensi
K'ele a tort m'i desgaige,
Je li renc son homaige
Et si me part de li.

V.
Mout est la terre dure,
Sans eve et sans humor
Ou j'ai mise ma cure,
Mais n'i keudrai nul jor
Fruit ne foille ne flor,
S'est bien tans et mesure
Et raisons et droiture
Ke li rende s'amor.

- letto 449 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/se-raige-et-derverie>